



In lieu per après-ski e scuntradas

A Savognin s'engascha la giuventetgna en il sectur da la gastronomia.

6



È ir a kino insumma anc confirm al temp?


En la columna «Convivenza» respunda Viola Cadruvi questa dumonda, or da sia optica.

12

südostschweiz

LA QUOTIDIANA

Redacziun: Via Sommerau 32, 7007 Cuirra, tel. 081 255 57 10, redacziun@laquotidiana.ch



Martin Bundi è mort il 1. da schaner 2020.

FOTO Y. BÜRKLI

«In grond Grischun» vegn a mancar

■ (fmr) Al di da Bumaun 2020 è mort l'anteriur cusseglier naziunal Martin Bundi (1932–2020). La FMR sa regorda da questa personalitad ruman-tscha, laschond vegnir a pled persunas che l'han accompagnà. En blers champs è Martin Bundi s'engaschè durant ses 87 onns da vita: sco scolast e vicedirectur al seminari a Cuirra,

sco istoriograf e perscrutader, sco promotur dal rumantsch e durant 20 onns sco cusseglier naziunal socialdemocrat. Ses collega istoricher Sacha Zala al circumscriba perquai suenter sia mort cun: «In grond Grischun, in grond istoriograf e scienzià.»

➤ PAGINA 2



Martin Bundi e ses engaschament per la lingua e cultura rumantscha. Tranter auter è el s'engaschè sur blers onns per garantir en Svizra a nivel costituzional la posiziun dal rumantsch sco linguatg uffizial. Dal 1971 ad ina sesida tar la Lia Rumantscha: Willy Dolf, Martin Bundi, Gion Deplazes, Rico Falett, Flurin Darms, Hendri Spescha e Gion Martin Pelican (da dretga).

MAD



Martin Bundi e ses engaschament per natira ed ambient. La stad 2000 tar ils Lais da Macun. Sco president da la cumissiun federala dal Parc Naziunal Svizzer ha el pudì portar si da l'Engiadina la tavla uffiziala en occasiun da l'engroniment dal parc en quel territori da Macun. In term impurtant en l'istorgia dal Parc Naziunal Svizzer, in'istituziun che Martin Bundi ha presidià durant ils onns 1991 enfin 2000.

FOTO PARC NAZIUNAL SVIZZER

■ VUSCHS

«El vegn a mancar»

«L'ovra istorica da Martin Bundi è colliada stretgamain cun ses engaschament public sco promotur da linguatg e politicher. Sin plaun naziunal èsi gartegià ad el cun grond success da trair a niz las pussaivladads cun ils instruments dal parlament. Martin Bundi è stà tut auter ch'ina persuna davos la glina. El n'era betg fixà sulettamain sin il Grischun e la Svizra. El è s'engascha adina per ils dretgs umans e la democrazia, cun curaschi civil è el adina s'exprimì tar dumondas actualas. Sco perscrutader ed autur da cudeschs e concepts tar l'istorgia grischuna e dumondas da la politica e cultura actuala è el sa participà enfin il davos a la discussiun publica. Tranter sias bleras publicaziuns registradas en las bibliotecas èn ovras da standard sco per exempel «Zur Besiedlungs- und Wirtschaftsgeschichte Graubündens im Mittelalter (1982) e «Frühe Beziehungen Graubündens zu Venedig» (1988). Sin nundumbravlas turas e lungas excursiuns ha l'engaschè protector da la natira ed ambient perscrutà il territori da cultura alpin, ina zona influenzada fermamain da l'istorgia. Sias conscientschas stupentas dals lieus ha el integrà en bleras da sias publicaziuns ch'han adina plectentà in vast publicum.»

Georg Jäger, ant. manader da l'Institut per la perscrutaziun da la cultura dal Grischun

«Dasper la politica e l'istorgia steva il rumantsch fitg a cor a Martin Bundi. Ses messadi: Dar e far tut quai che quel dova per viver e sa sviluppar. El ha gronds meritis per il nov artigel da linguas da 1996 en la Constituziun federala che dat al rumantsch il status sco lingua uffiziala svizra e fermes dretgs en l'agen territori. Cun ses spiert avert e sia savida era Martin Bundi en ed ordaifer il Grischun in partenari da discussiun fitg stimà en dumondas dal linguatg. Tge che stuess succeder per garantir a quel in avegnir pli segir ha el ditg en bleras radunanzas e suprastanzas e descrit cler e bain en pliras publicaziuns. Che sias propostas na crudavan ils ultims onns betg daperst sin il terren fritgaivel ch'el avess spetgà era trist, betg mo per el. Uss mancan sia vusch e ses engaschi per adina. Sias ponderaziuns valan ed obligheschan dentant vinavant. Accumpagnaders ed admoniders sco Martin Bundi dova ina minoritad sco la nosssa oz pli che mai. El vegn a mancar. El resta en nosssa meglra memoria.»

Bernard Cathomas, ant. secretari da la Lia Rumantscha, Cuira

«Martin Bundi è stà in lavurer serius ed insistent. Ses enorm engaschament social, cultural ed ecologic ha laschà a Berna ed en il Grischun fastitgs persistents. A la Partida socialdemocratica ha el avert en il Grischun las portas per vasts circuls da la populaziun lunsch sur ils mirs da la citad da Cuira. Quai han adina cumprovà ses resultats grondius a chascun d'elecziuns. Sco president da la cumissiun federala dal Parc naziunal ha el prestà ina contribuziun impurtanta d'integrar la platta singulara dals Lais da Macun en il perimenter dal Parc naziunal.»

Andrea Hämmerle, ant. cusseglier naziunal, Pratul

«In grond Grischun, in grond istoriograf e scienza, in char ami ans ha bandunà ed ans vegn a mancar. Martin Bundi è er stà in grond ami dal Grischun talian. El ha gè profunda chapientscha per la realitad da las valladas talianas dal Grischun. Uschia ha el mess quella en in vast context istoric e geografic e manà ella cun success betg sulettamain tar ils scienziads. A generaziuns da studentas e students ha Martin Bundi intermedità quella realitad e sensibilisà quellas e quels per la trilinguitad. Il Grischun talian ed il Grischun avessan urgentamain da bassegn da numerus Martin Bundis.»

Sacha Zala, istoricher ed ant. president Pro Grigioni Italiano, Berna

In vair Grischun, cun chantuns e sensori

Per la mort da Martin Bundi (1932–2020): Politicher, istoricher e promotur dal rumantsch

DAD AUGUSTIN BEELI / FMR

■ El saja stà ina «furmica publicistica», titulescha Linard Candreia il 2012 en il cudeschet per l'anniversari da l'80avel da Martin Bundi. En ina publicaziun giubilara aveva ina retscha da persunas da politica, cultura e furmaziun scrit in parairi personal davart il scolast, politicher ed istoricher barmier Martin Bundi. Quella publicaziun descriva il meglier vita ed ovra dal trapassà. Il di da Bumaun 2020 è Martin Bundi mort en la vegliadetgna dad 87 onns. El è in dals protagonistis da la politica e da la cultura dal Grischun. Ses meritis èn vasts ed entschaivan en ses vitg nativ: L'onn 1961 ha el fundà l'Uniun da musica da Sagogn. El ha dirigì quella, pli tard la musica instrumentala da Favugn. Tranter 1969 e 1974 ha el er edì en furma d'in cudesch sias retschertgas davart l'istorgia locala da Sagogn. El era losch da derivar da Sagogn. En quest lieu possedeve l'investg Tello en il medieval tempriv in bain central ch'el ha testamentà l'onn 765 a la claustra da Mustér. L'istoriograf ha inizià tranter auter las exchavaziuns archeologicas dals onns 1964 enfin 1968 a Sagogn. Quellas han purtà a la glisch numerus novs fatgs per l'istorgia da la colonisaziun en il Grischun.

Reconquistà il sez socialdemocratic

Durant sia lunga activitad n'han las ideas da Martin Bundi betg adina chattà amis. El era ina persuna dals principis, ad el gievi per la chaussa, el n'è mai stà ina bandiera. En circuls da la politica vegni ditg ch'el fissia daventà cusseglier guvernativ, sch'el fissia stà en la «dretga» partida.



Martin Bundi – davant sia chasa sin il Hegisplatz a Cuira l'onn 2013 cura ch'el ha survegni il Premi grischun da cultura.

FOTO Y. BÜRKL

Trais giadas, ils onns 1978, 1982 e 1986 ha il pussant bloc burgais impedì quai. Da chasa anora democrat era el daventà il onns sessanta in «cotschen», in socialist. En la patria han ins frenà, sin plaun federal dentant beneventà e promovì el. L'onn 1975 ha alura il pievel grischun, cunter tuttas resalvas burgaisas, tramess Martin Bundi a Berna. Igl era gartegià ad el da reconquistar il mandat pers l'onn

1963. Durant 20 onns, enfin dal 1995, ha el prestà e muventà fitg bler. Er davos las culissas ha el instradà e contrahà cun insistenza per soluziuns persistentas.

Passa 150 publicaziuns

La politica è stada si' occupaziun parziala. Cuzunt è Martin Bundi stà scolast al seminari da magisters a Cuira, istoricher e perscrutader. El ha rendì accessibel

nundumbravlas funtaunas istoricas e publicità sias descripziuns, analisas e scurvertas. En la Biblioteca chantunala datti dapli che 150 titels da cudeschs e publicaziuns or da sia plima. Il trapassà n'è uschia betg mo stà ina furmica publicistica, mabain in mammut da l'istorgia grischuna. Surtut era pervi da questa lavur istoriografica è el vegni undrà dal 2013 cun il Premi grischun da cultura.



Martin Bundi e ses engaschament politic: Durant 20 onns è el stà a Berna cusseglier naziunal, dal 1975 enfin 1995. La delegaziun parlamentara grischuna dal 1979: Ils cussegliers nazionals Dumèni Columberg, Toni Cantieni, Leon Schlumpf, Luregn Mathias Cavelti e Martin Bundi ed ils dus cussegliers dal chantun Ulrich Gadiet e Christian Jost (da san.).

MAD



Martin Bundi ed il punct culminant da sia carriera politica: L'onn 1986 ha il socialdemocrat pudì presidiar il cussegl naziunal. Suentar sia elecziun, ils 2 da december 1985, è el e sia dunna Käthi Bundi-Mittner arrivads cun in tren spezial a Maiavilla e vegnids beneventads da la populaziun.

FOTO SOMEDIA